

IN CHRIST ALONE

Yn Krist hepken ow threst yma,
Ev yw ow Howl, ow nerth, ow han;
An tir krev ma, an penmen ma,
Fast yth yw dhymm dre dhowr, dre dan.
Y g'renza pur, y gres mar dhown,
Ow strif yw deu ha ny'm beus own!
Ow oll yn oll, ow honfort vy,
Yn k'renza Krist y savav vy.

Yn Krist hepken, a wiskas kne'z,
Leunder a Dhuw yn fleghik gwann!
Y skornyas ro a wiryonzes
Tuz ev a vynna selwel glan:
Bys pan y'n Grows y ferwis Ev,
Y feu attyllys sorr an Nev;
Warnodho gorrays pegh pub ryw;
Dre vernans Krist yth ov vy byw.

Y gorf a veu y'n dor a-dhann,
Golow an byz a gavas ladh:
Mes ena tardha 'mes yn splann
A'n bedh 'tassorghas, genen hwath!
Dell sev yn trygh, ny glewav kraf
A volleth pegh ow toz warnav,
Rag ev yw dhymm, my dhodho Ev,
Dasprenyss gans Y woez mar grev.

Digablus ov, a'n bedh heb own,
Otta nell Krist eus ynnov vy;
A'm kynsa kri bys yn annown,
Yesus a rewle ow thenkys vy.
Na towlenn den, na ifarn krev,
Ny yll ow thenna a'y dhorn ev,
Bys pan dhehwel p' y'm gelow vy,
Yn nell a Grist y savav vy.

- Composed by Stuart Townend and Keith Getty, 2002
- Translated into Cornish by Ken George, 2023 Apr 15.
- Tune: In Christ alone.